



Roman Weishaupt, il mainagestiun da Teater Giuven Grischn.

FOTOS G. N. STGIER



Fascinar juvenils per il teater e per la cultura è in dals intents principals da l'instituziun.

Curs e purschidas èn apprezzads

Teater Giuven Grischn

DA GION NUTEGN STGIER / ANR

■ **En in ambient empernaivel, cun ina pitschna festa e cun in lavuratori ha festivà l'organisaziun da teater ses giubileum da tschintg onns. Cun retschaiver da curt in premi da teater naziunal han Roman Weishaupt e l'entira gruppa che promova en noss chantun il teater per giuvenils gi dubla raschun da far festa.** Dapi l'atun 2011 exista l'instituziun Teater Giuven Grischn. Ella è la plattforma ideala per dar a giuvenils la pussaivladad da frequentar curs da teater manads da persunas professunalas e dal rom. Ina da las finamiras principalas da l'organisaziun è cunzunt er da porscher ad uschè blers juvenils sco pussaivel l'access tar il teater contemporan, da pudair far teater, sa profundar cun litteratura da teater tradiziunala e nova, e lu-

ra er cun bleras furmas da teater. Cun curs professunals gartegia a las manadras ed als manaders da quels curs da fascinar mattas e mats da 14 fin 25 onns per il teater e per la cultura en general.

L'ocasiun per sa sviluppar

L'interess per ils curs da teater, per ils lavuratori cun ina bella paletta da temas e lura er per las produziuns è avant maun e quai en plis regiuns dal Grischn. Cunzunt a Cuira èn ils curs adina bain occupads, però fatg diever da la purschida gratuita vegn er en Surselva, en l'Engiadina, en il Grischn central ed en il Scanvetg. L'aspect social ha lura er ina gronda muntada, il svilup persunal e l'ocasiun da s'exprimer lur basegns, quai è er ina singularitad da Teater Giuven Grischn e ses curs. Mintgin ha lura er la pussaivladad da mussar sias fer-

mezzas, sias capacitads e quai senza esser sut pressiu, ditg auter fitg natural e liber.

Duas gratulantas prominentas

Gist uschè èsi er stà sonda tar il lavuratori en la «Postremise» che l'organisaziun ha organisà cun ina participaziun da 24 mats e mattas. Tuts han gi l'ocasiun da s'exprimer en lur atgna moda, cun lur agen caracter e da far ina buna experientscha er grazia a la scolaiziun professunala. Ils fritgs meritaivels han ils participants e las participantas dal curs da sonda lura racoltà vers saira cun pudair preschentar in pitschen teater a tut las persunas ch'èn vegnidas cun plaschair a la «Postremise» per gratular a Teater Giuven Grischn sin ses pitschen giubileum. L'organisaziun, ella che presta dapi il 2011 lavur exem-

plarica. Be plets plaschaivels per l'organisaziun ha cunzunt er chattà la gratulanta *Doris Caviezel-Hidber*, la cussegliera da la citad da Cuira, ella ch'è er stada a la festa da giubileum. Da gronda impurtanza per la promoziun dal teater è Teater Giuven Grischn er per *Ute Hafenburg*, la directura dal Teater da Cuira.

Fin oz 15 produziuns

Dapi tschintg onns han fin oz profità radund 200 juvenils dals curs, da las academias e da las produziuns da Teater Giuven Grischn. Gist 15 giadas èn ils acturs e las acturas da 14 fin 25 onns sa preschentads ad in vast public da bunamain 5000 persunas. En l'avegnir vuless l'instituziun porscher la pussaivladad da sa participar als curs er ad uffants dad ogt fin 13 onns cun esser

avant maun in grond interess per il teater gia en quella vegliadetgna. *Roman Weishaupt*, il teatrist, el che maina cun blier cor l'organisaziun ed el che viva per Teater Giuven Grischn, sa legra er dal success da ses project ch'è be suentar tschintg onns gia vegnì undrà avant trais emnas cun in premi da teater naziunal. Surdà quel premi dotà cun 50 000 francs ha l'Uffizi federal da cultura, el che undrescha dapi trais onns persunas ed instituziuns cun meritis en il mund da teater. L'instituziun Teater Giuven Grischn procura che l'art e la fantasia na moran betg or en il Grischn ed haja uschia pli che merità il premi. Sonda è vegnì fatg festa sin quel premi e quai en preschientscha da blers amis da Teater Giuven Grischn ed er dals dus acturs da professiun *Julian Grünthal* e *Meret Hottinger*.